

Kwenyusa lizinga lekulwa neBudlova Lobucondziswe Kubulili Lobutsite kanye Nekubulawa Kwabomake (i-GBVF) eNkhulumeni yakhe Yesimo Selive yanga-2024 layetfule ePhalamende, Mengameli Cyril Ramaphosa uvakalise kwesekela kwakhe Sifungo Savelonkhe sekulwa ne-GBVF lapho onkhe emadvodza atatinikela wona ngekwawo ekucedzeni budlova lobucondziswe kubomake.

SIFUNGO SEMADVODZA ASENINGIZIMU AFRIKA SEKUCEDZA BUDLOVA LOBUCONDZISWE KUBULILI LOBUTSITE NEKUBULAWA KWABOMAKE

NJENGENDVODZA, NGIYATINIKELA NJALO KUTSI:

1. Ngiphatse bonkhe bomake njengalabalingana nami.
2. Kuphatsa wesifazane njengemuntfu, hhayi njengentfo nome njengentfo lenginayo.
3. Ngesekele bomake ngemandla ami onkhe lenginawo nekudlala indzima yami ngemfutfo ngiphosele inchabhayi lisiko lekugagadlela kanye nekuvimba nome ngabe nguluphi luhlobo lwekukhobosa, kuhlukubeta nome budlova lobucondziswe kubomake.
4. Ngekhute lamanye emadvodza ngekutiphatsa kwawo lokungakafaneli nome kuphawula ngalokungakafaneli lakucondzise kubomake.
5. Ngihloniphe wesifazane njengaloku nami ngingalindzela kutsi ngihlonishwe njengendvodza ngobe inhlonipho, kulingana, kanye nemalungelo eluntfu kwabo bonkhe bantfu baseNingizimu Afrika eme anjalo akakhulunyelwa.
6. Ngibe sibonelo ekufundziseni bafana emndenini wami nasemmangweni wami ekutseni kuvakalisa imivo yabo akusilo luphawu lwekuba butsakatsaka, nekutsi budlova abusiyo indlela yekusombulula incabano nekutsi besifazane kufanele kutsi baphatfwe ngenhlonipho.
7. Ngiphatse labanye besifazane njengaloku ngitawutsandza nami kutsi make wami, dzadzewetfu, nome indvodzakati yami kutsi baphatfwe njalo.
8. Ngesekele kuphepha nenhlalakahle yebantfwana futsi ngisebente ngemfutfo ekulweni nato tonkhe tinhlobo tekuhlukubeta nebudlova.
9. Ngekhute futsi ngilungise kutiphatsa lokungakafaneli lokucondziswe ebantfwaneni lokwentiwa ngulabadzala nabontsanga.

NJENGENDVODZA, NGIYATINIKELA KUTSI NGEKE:

1. Ngimphakamisele sandla umuntfu wesifazane.
2. Ngesabise, ngifungele kabi, nome ngehlise sitfunti nome ngabe ngumuphi wesifazane, ngekwemtimba, ngemavi, ngekwemoya nome ngekwemacansi, nome ngivumele nome ngabe ngumuphi umuntfu kutsi ente loko.
3. Ngichubekisele embili imicondvo yenkholelo tsite ngabomake nome ngabe ngumuphi umcondvo ngemuntfu wesifazane losuselwa kuloko lakugcokile.
4. Ngente wesifazane ative ahlukubetekile ngekumgcolotela sikhatsi lesidze, ngemavi ami nome ngetento tami nome ngimente ative angakakhululeki ngenca yebukhona bami.

5. Ngimtsintse emtimbeni nome ngimtsintse ngekwemacansi umuntfu wesifazane ngaphandle kwemvume yakhe lecacile nome ngimphoccelele kutsi ente intfo langayifuni.
6. Ngivumele nome ngibindze macondzana nebudlova lobucondziswe ebulilini lobutsite.
7. Ngibalekele tibopho tami njengababe, nangabe nginebantfwana.
8. Ngisebentise sikhundla sami ekhaya, emsebentini kanye nakuletinye tindzawo tetenhlalo kutsi ngibukele phasi emalungelo eluntfu newesitfunti sabomake.
9. Ngente umntfwana kutsi ative angakaphephi nome angakakhululeki ngebukhona bami, ngemavi nome ngetento.
10. Ngitsintsane nome ngabe nguyiphi indlela lengakafaneli nemntfwana nome ngingayihloniphi imikhawulo yabo.

Sayina lesifungo lapha:
